

Xroon saoxín ikjin ch'ín Pablo chr'éhen ch'án tí sín tinkáchónki Cristo chjasin Tesalónica

Ch'ín Pablo nixjehé ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhná kichó ni njinko chjasin Tesalónica kíxin jnkokoá tinkáchónkini It'eni Dios la ko Inchéni Jesucristo. Kjuasáyé It'eni Dios la ko Ichéni chrók'uejorá.

*Tí sín ókjé chjasin mé kjuíncheyóhē sín tí sín
Tesalónica*

² Jnkoyaxón chjéheni Dios kjuasáya la ko t'ákjenxⁱnni tí jahará kaín rá kíxin jehe ch'án mé chrókjuinkⁱtsa ch'án tí jahará. ³ Tió nixjehéni It'eni Dios xraxinkaonni kíxin kaín əsánrá kuítekáonrá Inchéni, a ntá tjejoch'erá xra la ko imá tjuéhérá kíchuárá ntá jnkokoá tjejochonhénrá tsokjan Inchéni Jesucristo. ⁴ Kíchóni jahará, imá tjuahará Dios la ó noheni kíxin jehe ch'án tsíkjeyará ch'án tí jahará. ⁵ Na mé xíkaha tió kjuíjini chjasánrá kjuakoharáni tí tan jína nixin tsaáxinni chrónkani na jehya iténni ó. Náhí. Kjaxin kjuachaxién Nchákuén Dios kjuakoxⁱnni la ko tí Nchákuén Dios mé kjuíncchenoheni kíxin tí itan kjuakoni la chaxín ntoá. Jahará la ó nohará jína kíxin nkexrí k'uéjóni tí tjejorá kíxin xíkaha chrók'uejorá chrókjuakoxⁱnrá.

⁶ Mé xíkaha kjuincheyohérá tí jeheni la ko kjuincheyohérá tí Ìnchéni Jesucristo. A ntá tió kuínhínrá tí itén Dios ntá kaín asánrá kuinkachónkirá Ìnchéni la ko kócháhará kíxin tí Nchakuen Dios mé t'etuenhen asánrá kjónté nchónhya nkehe k'uatsíncará. ⁷ Mé xíkaha kjuákuexinrá kaín tí sín tinkáchónki Ìnchéni ntiha estado Macedonia la ko tí sín estado Acaya. ⁸ Jahará kjuákoxinrá tí itén Dios la jehya jehó estado Macedonia la ko tí estado Acaya kjuákoxinrá. Náhí. Na mé kaín chjasin chjinaxón ntiha kuínhin sín kíxin nkexrí tinkachónkirá Dios. A ntá jeheni na í t'ichjánxínhya í jnko nkehe naxa chróchronkani, ⁹ kíxin ijie jehe sín mé tjejóchronka sín kíxin nkexrí kjuíjini chjasánrá a ntá kaín rá kjuánjonrá kjuachaxin k'uéjóni la ko kuítekáonrá tí itén Dios kjuakoharáni la ntá kuitohérá kaín tí nkehe tsíkjanoya kíxin ntá kjuankíxinrá kuinkachónkirá Dios tjechón chaxín. ¹⁰ La ko kjaxin tjejóchronka sín kíxin jahará tjejochonhénrá tsokjanxín nkaya nkajní tí Xjeen Dios na mé Jesús. Ó kjuíñchexechón Dios tí Xjeen ch'án Jesús ntá jehe ch'án mé sinchekaáni kíxin chrókjuasótexíhyani tí nkehe jínahya chrókjuasótexínni itsi.

2

Tí xra tsíkjich'e ch'ín Pablo tí chjasin Tesalónica

¹ Kónohará kaín rá kíchó ni kíxin jehya chónkó kjuíjini chjasánrá. ² Ó kónohará kíxin senó tí sín chjasin Filipos k'uékjinchejkjasóteni sín la ko k'uék'ántaxínhinni sín. Kjánchó Dios mé kjuínkitsa ntá chrakonhyani kjuakoharáni tí tan tsaáxinni

kuènte Dios kjónté imá k'uénínkakonhenni sín.
³ Kónohará kíxin jehya ntoáhya kjuäkoharáni la ko jehya ijnko nkehe náxrjónhya kjuakoni la ko kjuít'ayahyaráni ninkehó. ⁴ Náhí. Dios mé kjueyá ch'án tí jeheni kíxin chrókjuakoni tí tan tsaáxinni, mé xíkaha ntoá tjakoni. Jehya kíxin chojni ó nchechéheni. Náhí. Nchechéheni Dios tí nkexro nohe nkehe tónhen asénni. ⁵ Ó nohará kíxin kjuich'iyaxínhani itan imá náxrjón kíxin xíkaha chrókuakitsjexínni chichaon chrókjuachani. Náhí. Dios la ó nohe ch'án kíxin xíkahya kjuich'eni.
⁶ Tjeyáhyani kíxin chojni chrókjuikosáyeheni sín la á jahará la o í so chojni. Náhí, xíkahya ch'eni, kjónté chóntani kjuachaxin chrók'uetuānhanráni kíxin chrókjuánjonrá nkehe chrók'uáyéheni kíxin jeheni ch'eheni xra Cristo. ⁷ Jnkojína k'uénixjaharáni k'uék'ejóni. Éxí yóhé ijnko iné xjan t'ayakonhen xjeen kíxin ts'ánkí xjan mé xíkaha jeheni k'uàyakonhanráni tí jahará. ⁸ Imá tjuàhará ntá jehya jehó tí itén Dios chrókjuäkoharáni. Náhí. Kjónté chrók'uenxínni tí tjäkoharáni kíxin xíkaha imá tjuahará. ⁹ Kichóni, chróxraxinkáonrá kíxin tió k'uéjóni chjasánrá la mé nchónhya xra kjuich'eni nchäkotjin la ko tie ntá kjuachani chichaon k'uénaxínni nkehe sineni kíxin tjinkakonhyani kíxin chrótjáharáni xra chrókjuánjonrá nkehe chrókjoneni nachrohe k'uejóni ntíha kjuäkoharáni itén Dios.

¹⁰ Jahará la ó nohará la ko ó nohe Dios kíxin chaxín jína k'uéjókoaráni jahará chojni tinkáchónki Inchéni. Nijnko nkexro ts'ekahyani jié kíxin ichréni nkehe jínahya chrókjuich'eni. ¹¹ Jahará ó nohará

kixin kjuakoharáni la ko kjuínchechéheni tí jahará jnkojnkorá éxí ch'e ijnko it'é xjan tjuéhe xjeen ch'án. ¹² La ko k'uētuñhanráni kixin jína chrók'uejorá éxí tjinkaon Dios chrók'uéjó tí sín tinkáchónki ch'án kixin jehe ch'án ó k'uíyahará ch'án kixin chrók'uayéhérá tí kjuachaxin kuènte ch'án.

¹³ Méxra jnkochríxín tjancheheni Dios kjuasáya kixin tió kuínhínrá tí tan jína kuènte ch'án kjuakoharáni na ntá kjuátsoanrá kixin chaxín tí tan jína kuènte Dios ntá jehya tan kuènte chojni a ntá kaín rá ó kuítekáonrá tí tan a ntá k'uíxitóxín ntíjará. ¹⁴ Mé xíkaha jahará kichó ni kjuasótiará kónínkakonhanrá tí sín chjasánrá éxí yóhę kónhen tí sín kuènte Dios tinkáchónki Ìnchéni Cristo Jesús tí estado Judea kixin tió kjuankíxin kuinkáchónki sín Ìnchéni ntá tí sín judío chjasén sín mé kjuankíxin sín kónínkakonhen sín chrók'óyán sín. ¹⁵ A ntá tí sín judío a mé tsík'óyán sín Ìnchéni Jesús la ko tsík'óyán sín tí sín tsíchronka tí itén Dios ósé la xíkaha kjaxin k'uinkíténi sín. A ntá xíkaha kjuich'e sín la kónínkakonhen sín kaín chojni. A ntá Dios la kóxrjíenhya ch'án kixin xíkaha kjuich'e sín. ¹⁶ A ntá tjinkaonni kixin chrókjuakohéni tí sín jehya judío tí tan jína chrókuaáxin sín a ntá tí sín judío tjinkakonhya sín chrókjuakoni. Na mé xíkaha imá ncheck'ánki sín tí jiē kuènte sín. A ntá xíkaha kjuich'e sín ntá Dios sincheckjasóte ch'án tí jehe sín.

Ch'ín Pablo tjinkaon ch'án sáchrókjuitsjehe ch'án ínaá tí sín chjasin Tesalónica

¹⁷ Kichóni, tió kuítóheni tí jahará a ntá kjónté ókjé k'uéjóni la k'uéxraxinkaonni kaín asénni tí ja-

hará la ko imá tjinkaonni chrókjuijitsjeheni tí jahará ínaá. ¹⁸ Na mé xíkaha janhan Pablo itsjé veces mé tjínkávan chrókjusántsjaha tí jahará, a ntá tí ch'ín Tsochren mé k'uínkakònna ntá xitjahya tsjasán. ¹⁹ ¿Nkehe tsónhen tí xrä tjejóch'eni tjejóchóenxinni la ko nkekuènte tjejóchéheni? Jähará mé tsochèxínni tió tsi Ìnchéni Jesucristo kixin kuítekáonrá ch'án. ²⁰ Méxrä jahará mé kóchèxinni kixin kuítekáonrá.

3

¹ Ntá imá kóxakonhenni. Ntá kjuenkayáxinni kixin chrókójína jehóni chrókuitoheni chjasín Atenas ² na ntá ichr'ánni tí kichó ni Timoteo a tsjjitsjehe ch'án tí jahará kixin kjaxin ixrä kuènte Dios tjech'e ch'án tjejókoni ch'án tjako ch'án tí tan kuènte Cristo tsaáxinni. Ntá ichr'ánni ch'án kixin sintaxraxinkonrá ch'án tí itén Ìnchéni la ko sinchechéhé ch'án əsánrá ³ kixin tsoxrjéhya əsánrá má kixin tí kjuaxróxinhya tjejot'atsíncará. Kixin xíkaha ó nohará kixin t'ichjánxiñ tsjasótexínni tí xrä kuènte Ìnchéni. ⁴ Naxä k'uéjóni jnkokoá ntihá la ó tjonkará kixin kaín ni kjuaxróxinhya tsónhenni tsjasóteni. A ntá jie la ó nohará kixin chaxín xíkaha kónhen. ⁵ Méxrä imá kóxakonna ntá ichr'an kichó ni Timoteo kjuíjitsjehe ch'án nkexrí tjejorá, a naxä tinkachónkirá Ìnchéni ə ách'e ch'ín Tsochren chrókjachroerá chrókuitohérá tí ntje Ìnchéni a ntá chrókochónkó kaín tí xrä kjuich'eni kjuakoharáni.

⁶ Na ntá ó kjanxin ch'ín Timoteo chjasánrá Tesalónica chrónka ch'án kixin jína tjejorá naxä tinkachónkirá Ìnchéni, la ko naxä tjejorá tjuèhérá kíchuárá la ko chrónka ch'án kixin xraxinkáonrá

tí jeheni tjinkáonrá chrókjuijitsjeheni tí jahará. Kjaxin jeheni xíkaha tjinkaonni chrók'uikonni tí jahará. ⁷ Mé xíkaha kichó ni tjejót'atsíncani kjuaxróxinhya ntihi na ntá kjónté kóchéhé asénni kuínhinni kíxin kaín asánrá naxa tinkachónkirá Închéni. ⁸ A ntá kuínhinni xíkaha kíxin jína tjejorá naxa tinkachónkirá Închéni Jesús a ntá antsí kóchéheni. ⁹ Ntá imá tsjancheheni Dios kjuasáya kíxin xíkaha imá chéhé asénni kíxin tí jahará tinkachónkirá ch'án. ¹⁰ Tie la ko nchakotjin chronóéheni Dios kíxin tsjanjon ch'án kjuachaxin tsjijitsjeheni tí jahará ínaá kíxin naxa t'itjáyan iso nkehe chrókuakoharáni naxa chrók'uítjárá nkexrí jína chrókuinkachónkirá Închéni.

¹¹ Tjejótjancheheni T'éni Dios la ko Închéni Jesucristo kíxin chrókjuijitsani ch'án chrókjuijitsjeheni tí jahará ¹² la ko tjancheheni Închéni kíxin chrókjuijitsa ch'án tí jahará kíxin antsí má chrótjuèhérá kíchuárá la ko chrótjuèhérá kaín xín chojni éxí yóhe tjuàhará. ¹³ Tjancheheni ch'án kíxin sintaxraxinkaonrá ch'án kíxin kaín asánrá chrókuitékáonrá ch'án kíxin ntá tsochóntahya asánrá ninkehó jié nkayakon It'éni Dios tió tsokjan Închéni Jesús tsikao ch'án kaín tí sín ó tsíkótjóá.

4

Nkexrí tóxrjínhjn Dios chrók'uéjóni

¹ Jahará kichó ni chronóaharáni la ko ntaxraxinkaonráni tí kjuachaxin ihnjé Închéni Jesús kíxin jína chrók'uejorá tinkachónkirá Închéni

éxí tjejoch'erá jie kixin éxí kjuakoharáni. Mé xikaha jína sinchechhéhérá Dios.

² Ó nohará tí nkehe kjuakuaxinráni kjuachaxin kuèente Închéni Jesús. ³ Tí nkehe tjinkaon Dios kixin jína tjóá chrók'uejorá la ko chrókjuásinkoahyará jie í jnko chojni chjin ókjé. ⁴ Jnkojnkorá chrókónohará chróchontará jnkojnko ichjiánrá la ko jína chrók'uejorá chrótjuèhérá kíchuárá. ⁵ Jehya kixin chrókjuakérá əsánrá tí nkehe jínahya chrókjuich'erá éxí ch'e tí chojni chónhya Dios. ⁶ Nijnkorá chrókjuich'iyehérá ichjién kíchuárá xikaha kixin Închéni mé imá sinchekjasóte ch'án tí chojni xikaha sich'e mé xikaha kjuúntaxraxinkaonráni senó. ⁷ Dios mé k'uýyeheni ch'án kixin jína chrók'uejóni, jehya kixin naxa chrókjuasinni jie. ⁸ A ntá tí sín chóntehya kjuasáyé tí nkehe tjakoni na mé jehya kixin chóntehya sín kjuasáyé chojni. Náhí. Chóntehya sín kjuasáyé Dios, tí nkexro kjuanjon tí Nchäkuen chántani.

⁹ A ntá tí tjuèhérá kíchuárá la í t'ichjánxinhya naxa chrókjinni tsochronkani kixin nkexrí chrótjuèhérá kíchuárá kixin jehe Dios mé tjetjakohará ch'án nkexrí chrótjuèhérá kíchuárá. ¹⁰ Xráxín xikaha tjejoch'erá tjuèhérá kaín tí sín kichó ni tjejó estado Macedonia. Kjánchó chronóaharáni kichó ni kixin əntsí má chrótjuèhérá kíchuárá. ¹¹ Tóxakonhanrá kixin kjuaxróxin chrók'uejorá. Jnkojnkorá nohará nketí xra chrókjuich'exínrá tjárá éxí k'uëtuñhanráni. ¹² Na mé xikaha chrók'uikon tí sín chónhya Dios ntá chróchontahará sín kjuasáya la ko chrók'uitjáyanhya ninkehó nkehe chrókuicháxinhánrá.

Itsi Ìnchéni Jesús

¹³ Kíchóni, tjínk̄avan kíxin chrókónohará nkehe tsonhen tí sín tsík'en. Na mé tjínk̄avan kíxin kánhyó chrótsj̄ankàm̄ará sín chrókóyóahyará tí sín tinkáchónkihya sín Ìnchéni nax̄a chóenhya sín kíxin chróxechón sín ínaá. ¹⁴ Kuítekaonni kíxin ik'uén Ìnchéni Jesús la ko xechón ch'án ínaá la ko kj̄ax̄in titekaonni kíxin Dios kjuínchexechón Jesús la ko tió tsokjan Jesús ntá sinchexechón Dios kaín xín tí sín tsík'en kuítekaon sín tí jehe ch'án.

¹⁵ Méxra chénkani ti jahará tí nkehe kjuako Ìnchéni kíxin tí nax̄a tjejóchónni tió tsi ch'án na kjónté nax̄a tsitónxinyani nt̄ia, nax̄a tsochónhenni tí sín tsík'en. ¹⁶ Jehe Ìnchéni mé ts'inkajinxín ch'án nkaya nkajní la ko itsen tsonixja ch'án kíxin tí kjuachaxin jié kuènte ch'án la ko ts'èya tí ángel t'etqan la ko tsontáchro tí trompeta kuènte Dios. A ntá kaín tí sín tsík'en kuítekaon sín Ìnchéni Cristo la senó tsoxechón sín. ¹⁷ A ntá chr'éxín kaín xinni tjejóchónni la ko kaín xín tí sín tsíxechón mé jnkokoa tsochrìnni kíxin tí kjuachaxin jié kuènte Ìnchéni. A ntá xríkjan tjuí tsoxetani ch'án. Mé xíkaha ts'ejókoni ch'án jnkochríxín. ¹⁸ Méxra xíkaha chrókjuinchechéxínrá kíchuárá tí tan i kíxin xíkaha tsonhen tió tsokjan Ìnchéni.

5

¹ A ntá tí yaon tsonhen tíhi kíchó ni t'ichjánxínhyá nax̄a tsokjinni í jnko nkehe tsinhínrá. ² Jahará ó nohará jína kíxin titàya itsi tí yaon tsokjan Ìnchéni éxí yóhé chrókui ijnko xíchqe tí tie a. ³ Ts'ejó sín itsjo sín kíxin

ijie kjuaxróxin tjejó sín kaín sín la ko ninkehó nkehe tsönen sín. Ntá xrínahya titaya itsi tí kjuaxikaon jié la ko kjuachrakon mé ts'itjáyanxín tí kjuachón chróchonta sín éxi yóhe ijnko tjan tjejá xrínahya titaya tsjankíxin ts'ontáki tjan kixin sinchekokjíhi tjan xjeen tjan na mé jehe tjan xitjahya tsontáchro tjan “Náhí”, mé xikaha jehe sín chóntahya sín nkerí tsaáxin sín. ⁴ Ntá jahará kichó ni sítiéhya tjejorá ntá chróchrakonhyará tí yaon itsi Ìnchéni. Tí náhí chróchrakonrá éxi chrókui ijnko xichée chrókjuntachrakonrá. ⁵ Ntá jie kaín rá mé tjejorá tí ntia t'inkáséyan. Jeheni la jehya tjejóni tí ntia sítié a. ⁶ Méxra xikaha chrók'uéjójuahyani éxi tjejójua tí sín í so na mé chrók'uejótsjeheni chrókjuenkayáxinni jína. ⁷ A ntá tí sín t'ajua la tjejójua sín tí sítié ó la ko tí sín tókoan la tókoan sín tí sítié a. ⁸ A ntá jeheni na tjejóni tí ntia t'inkáséyan t'ichjánxín kixin jína chrók'uéjóni chrókjusinhiani jie. Chrókuinkáchónkini Ìnchéni la ko chrótjuéheni ch'án. Ntá jeheni na Ìnchéni ts'ayakonhenni ch'án tsaáxinni ch'án éxi tí ch'in soldado t'inkáya ka tsík'óna chica kixin kohya nkehe tsönen ntakuin ch'án. La ko chrók'uéjóchónhenni itsi Ìnchéni tsaáxinni ch'án na mé éxi tí ch'in soldado a xrasín ch'án nkehe tsík'óna chica t'ayakonhen kja ch'án kixin kohya nkehe tsönen kja ch'án. ⁹ Kjueyáhya Dios tí jeheni kixin chrókjuincheckjasóteni ch'án. Náhí. Kjueyá ch'án tí jeheni kixin chrókuaáxinni Ìnchéni Jesucristo. ¹⁰ Jehe Jesucristo mé k'uenyákonhenni ch'án kixin chrók'uéjókoni ch'án jnkochríxín kjónté naxa tjejóchónni o kjónté ó tsík'enni tió tsokjan

ch'án. **11** Méxra xikaha chrókjuínchechéhérá kíchuárá la ko chrókjuínkitsará kíchuárá kíxin jína chrók'uéjó sín éxí xráxín tjejoch'erá.

Ch'ín Pablo mé nchexraxinkaon ch'án tí sín tinkáchónki Cristo

12 Kíchóni chronoàháráni kíxin chróchontehérá kjuasáyé tí sín tjejoch'e sín xrä kuènte Dios ntiha tjejótjitaón sín ntja chrónka sín itén Ìnchéni. **13** Na mé chróchontehérá sín kjuasáya la ko chrótjuéhérá sín má kíxin tí xrä tjejoch'e sín. A ntá jahará kaín rá jnkojína chrók'uejokoará kíchuárá.

14 Méxra tétuñhanráni kíchó ni kíxin chrókjuéntuéhérá tí sín tjinkakonhya sich'e sín xrä la ko chrókjuínchechéhérá asén tí sín kóxrjé asén sín la ko chrókjuínkitsará tí sín naxä noehya sín jína la ko chrókóninkákuénhyará ninkexró.

15 Tóxakonhanrá kíxin chrókjuich'ehyará jínahya tí sín jínahya kjuít'ahará. Íchá jína chrókjuákoxinrá nkehe jína chrókjuich'erá kíxin ts'ikon kaín xín chojni chjasintajni kíxin jína tjejotjenkayáxinrá.

16 Méxra nchechéhérá asánrá jnkochríxín.

17 Chrókuitoéhyará chrónixjehérá Dios jnkochríxín.

18 Kjónté ichréni nkehe chrókónhanrá la chróchjehérá Dios kjuasáya kíxin xikaha mé tjinkaon ch'án chrókjuákoxinrá kíxin tinkachónkirá Ìnchéni Cristo Jesús.

19 T'ók'anakahyará tí xrohi t'inkáséyanxín Nchäkuén Dios. **20** Chonteherá kjuasáyé nkehe tjako tí sín kíchó ni chronkaxín sín kjuachaxin kuènte Nchäkuén Dios. **21** Chrótsjehérá jína tí nkehe tjejoch'e sín. A ntá tí jína na chrókuítekáonrá.

22 Chrókuitohérá kaín xín nkehe jínahya.

23 Dios mé tjanjon kaín kjuaxróxin ntá tjancheheni ch'án kíxin jehe ch'án sinchetjóará ch'án la ko ts'ayakonhen ch'án nchakuanrá la ko əsánrá la ko cuerpo kuéntará kíxin tsochóntahya ninkehó jie tió tsi Ìnchéni Jesucristo. **24** Dios tí nkexro kjueyá tí jahará mé jína ch'án la ko kaín tí nkehe ntáchro ch'án la tsoxiteyá.

Ch'ín Pablo kjuixixín nixjehé ch'án sín la ko tjanchehe ch'án Dios kíxin chrókjuincheayaon tí jehe sín

25 Kichóni chrónóehérá Dios kíxin tsjinkitsani ch'án kaín ni.

26 La ko nixjehérá kaín xín tí sín kichó ni ntiha tséhérá tja sín.

27 T'etqanxínni tí kjuachaxin kuénte Ìnchéni kíxin nchekuáxinrá tí xroon chr'anhnánrá tsinhin kaín xín tí sín kichó ni ntiha.

28 Kjuasáyé Ìnchéni Jesucristo sintayaonrá ch'án. Amén. Ó tjen.

Tí Nuevo Testamento cuènte Inchéni Jesucristo C'óna Nquìva

New Testament in Popoloca, San Juan Atzingo

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

b9b09122-b3f6-59f0-9594-749907b32b5b